




კავკასიის ეკონომიკის ყოველთვიური მიმოხილვა

თებერვალი 2024





ეკონომიკური ზრდა



წინასწარი მონაცემებით, 2023 წელს კავკასიის ეკონომიკის ზრდა 4.4%-ია. 2022 წელს კავკასიის ეკონომიკური ზრდა 7.8%-ს აღწევდა. ეკონომიკური ზრდის ტემპის კლება რუსეთიდან ადამიანური და ფინანსური კაპიტალის ნაკადების შემცირებასა და წინა წელთან შედარებით, ნავთობის დაბალ ფასებს უკავშირდება.


✚ წინასწარი მონაცემებით, გასული წელს საქართველოს ეკონომიკა 7%-ით გაიზარდა, ხოლო დეკემბერში ზრდის ტემპი 8.3%-ს შეადგენდა. ზრდაში მნიშვნელოვანი წვლილი საფინანსო, სამშენებლო, მრეწველობის, ინფორმაცია და ტელეკომუნიკაციების სექტორებმა შეიტანეს. კლების ტენდენცია დაფიქსირდა ენერჯეტიკის და უძრავი ქონების სექტორებში.

🇧🇪 კავკასიის რეგიონში ზრდის ყველაზე მაღალი ტემპით სომხეთი გამოირჩევა. გასულ წელს სომხეთის ეკონომიკა 9.4%-ით გაიზარდა. უშუალოდ დეკემბერში, წინა წლის იმავე თვესთან შედარებით, ეკონომიკა 9.5%-ით გაფართოვდა. სომხეთის ეკონომიკურ ზრდაში განსაკუთრებული წვლილი სავაჭრო სექტორს აქვს, რომელმაც ამ პერიოდში 25.7%-ით მოიმატა, ხოლო სამშენებლო დარგმა კი - 14.8% -ით.

🇦🇲 რეგიონში ზრდის ყველაზე დაბალი ტემპი აზერბაიჯანში დაფიქსირდა. 2023 წლის განმავლობაში აზერბაიჯანის ეკონომიკა 1.1%-ით გაიზარდა. აზერბაიჯანის ეკონომიკის 36.9% ნავთობისა და გაზის ინდუსტრიას უკავია. ენერგორესურსების ფასი, 2022 წლის ანალოგიურ პერიოდთან შედარებით, შემცირებული იყო. ნავთობისა და გაზის ინდუსტრიის გარეშე ზრდის მაჩვენებელი 3.7% დაფიქსირდა.



ინფლაცია და მონეტარული პოლიტიკა



ინფლაციის მაჩვენებელი კავკასიის რეგიონში ეკონომიკური ზრდის ტენდენციებს იმეორებს. საუკეთესო მდგომარეობა სომხეთშია, ხოლო ყველაზე ცუდი მაჩვენებელი აზერბაიჯანში ფიქსირდება.

✚ საქართველოში 2023 წელს ინფლაციის ტემპი, წინა წელთან შედარებით, შემცირებული იყო. 2024 წლის იანვარში სამომხმარებლო ფასების წლიურმა ზრდამ 0% შეადგინა. იანვრის ინფლაციაში მაღალი წვლილი ტრანსპორტის ფასებმა შეიტანა, რომელიც 4.4%-ით გაიზარდა. თუმცა, რიგ სექტორებში ფასების კლება დაფიქსირდა, მათ შორის, ჯანდაცვის სერვისების ფასები ყველაზე მეტით, 3.3%-ით - შემცირდა. ამ ფონზე, ცენტრალურმა ბანკმა ბოლო გადაწყვეტილებით რეფინანსირების განაკვეთი 9%-მდე შეამცირა.

🇦🇿 რეგიონში ყველაზე დაბალი ინფლაციით სომხეთი გამოირჩევა. მიმდინარე წლის იანვარში სამომხმარებლო ფასების წლიური კლება 0.9% იყო. ყველაზე მაღალი, 7.4%-იანი ზრდა ალკოჰოლისა და თამბაქოს ჯგუფში დაფიქსირდა, ხოლო 5.8%-იანი კლება სურსათის ფასებზე. ეს კი სამომხმარებლო ფასების ძირითადი ნაწილია. სომხეთის ცენტრალურმა ბანკმა მონეტარული პოლიტიკის შემსუბუქება 2023 წელს დაიწყო. ბოლო გადაწყვეტილებით, რეფინანსირების განაკვეთი 8.75%-მდე შემცირდა.

🇦🇲 აზერბაიჯანში ინფლაციის ტემპი, კლების მიუხედავად, შედარებით მაღალ ნიშნულზე რჩება. 2024 წლის იანვარში სამომხმარებლო ფასების წლიურმა ზრდამ 1.7% შეადგინა. გასული წლის დეკემბერში ინფლაცია 2.1% იყო. აზერბაიჯანი რეგიონში შედარებით მაღალი ინფლაციით წინა პერიოდებშიც გამოირჩეოდა. მიუხედავად ამისა, აზერბაიჯანის ცენტრალური ბანკი პოლიტიკის გამკაცრებისგან თავს იკავებს. იანვარში მიღებული გადაწყვეტილებით პოლიტიკის განაკვეთი 7.75%-მდე შემცირდა.